

Duzma Ranz Gou

贵港市覃塘区蒙公镇高占小学三年级 Yiz Cinhniz/庾珍妮

Ranz gou ciengx miz duz ma ndeu, de daengx ndang bwn hausaksak, diuzrieng dinjdandanj, doiq rwz gig raeh, song aen lwgda ndongqliklik dwk cimyawj seiqhenz, gou heuh de guh “Daeghau”.

Daeghau dwggyaez lai lo. Bingzciengz gou cuengqhag dauqma seiz, de cungj bibi diuzrieng buet gvaqdaej coh gou, lumjbaenz doiq gou naeuz: “Angqcoux bouxcawj iq dauqma!” Gou rubrub aen gyauej de, de couh sim’ angq dwk heux gou baetbaet rieng, nyiengxnyiengx gyauej. Daeghau gig maij gwn baubyak, moix baez daxmeh riuj aen cwxiq bae haw dauqma, Daeghau

cungj dwg boux daih’ it buet daengz dangqnaj daxmeh, song aen lwgda ndongqliklik lumj rox gangjavah ityiengh muengh daxmeh. Daxmeh daegdingh mbouj hawj de gwn, de couh guh gij yiengh mbouj angq, lij “vang vang” dwk raeuq mbouj dingz, daxmeh mbouj miz fap lo, cijndaej hawj aen baubyak de gwn. De raen daxmeh daj ndaw cwxiq gaem aen baubyak okdaeuj, couh lumj duz nyaenma iek ityiengh diuq hwnj-daeuj ciengj aeu gijgwn, liuxle ndoj youq giz ndeu, miz feih fwdfwd dwk gwn hwnjdaeuj.

Daeghau mboujdanh dwggyaez, lij gig souj aen hong bonjfaenh. Moix

haemh, de cungj dwg ninz youq henz bakdou hung ranz gou, song gaiq rwz de gig lingz, cijaeu dingq raen di sing ndeu, couh “vang vang” raeuq mbouj dingz. Caj dou hai dou okbae yawj-yawj seiqhenz ranz, lij doiq de naeuz: “O, Daeghau, mbouj miz gijmaz saeh, mwngz cuengqsim ba!” De cij bibi diuzrieng, ngaekngaek gyauej, sim’ onj bae ninz lo. Daxboh daxmeh ciengzseiz haenh Daeghau, gangj de dwg Bouxbing cungsim souj aen ranz dou.

Daeghau geijlai dwggyaez ha, gou maij duzma ranz gou.

(lauxsae son’ gyauq: Luz Haij-ginz/陆海琴)



Guh Gyaujswj

上林县大丰镇中心学校四(2)班 Liengz Swhgiz /梁思其

Miz ngoenz ndeu haetromh, gou ngamq ninzndiu, dingqnyi ndaw ranzdajcawj gij singyaem “bizliz bazlaz”, roxnyinh geizgvaiq lai: “Daxmeh guh gijmaz ne?” Seizhaenx, miz heiqhom ci gvaqdaej. Yienzlaiz dwg heiq hom gij dungxsaej gyaujswj. O, ngoenzneix daxmeh guh gyaujswj.

Gou sikhaek hwnjndang, buet coh ranzdajcawj. Daxmeh caeuq dahcej cingq cawj gij dungxsaej gyaujswj ne. Daxmeh raen gou daej lo, couh mizdi ndaenggon le doiq gou gangj: “Baenzlawz yiengh, hom mbouj hom ha? Raeuz yaek guh gyaujswj lo.” “Hom, hom dahraix, gou hix yaek guh gyaujswj.” Gou han daxmeh, myaiz yaek doek lo, couh siengj sikhaek ndaej gwn gyaujswj couh ndei lo.

Gou ciuq daxmeh guh, dawz naeng gyaujswj mbe youq gyang fwngz, daek gij dungxsaej coq gwnz naeng gyaujswj, doiq cie, nyaenj henz, fung bak. Song mbaek baihnaj guh ndaej gig ndei, hoeng doeklaeng nyaenj naeng fung bak baenzlawz guh cungj mbouj ndei ne? Mbouj dwg nyaenj vaih henznaeng, couhdwg deng naeng nem fwngz gou, gij dungxsaej mbouj dwg daj mbiengj haenx roh okdaeuj, couh dwg daj mbiengj

neix conh okdaeuj, caencingq dwg “dungxsaej roh” lo. Yienznaeuz dawz henznaeng gyaujswj nyaenj ndei lo, hoeng nyaenj ndaej gij yienghceij gyaujswj mbit sam mbit seiq, yakyawj raixcaix. Daxmeh caeuq dahcej raen le cungj rihaha hwnjdaeuj. Daxmeh lwnh gou: “Sien daek vanj raemx ndeu daej, aeu lwgfwngz yomx di raemx le, caiq cat hauej henznaeng gyaujswj bae, yiengzhaeuz nyaenj ndei bae, baujcingq naeng gyaujswj mbouj nem fwngz lo.” Gou ciuq daxmeh gangj haenx bae guh, lai ndei bau dahraix lo. Hoeng, baenzlawz cungj mbouj beij daxmeh caeuq dahcej bau ndaej ndei yawj. Daxmeh gujli gou naeuz: “Mbouj youqgaenj, bau lai le couh bau ndaej ndei lo.” Gou youh laebdaeb bau gyaujswj.

Gyaujswj cawj ndei lo, daxmeh caeuq dahcej cungj ceng gwn gij gyaujswj gou bau haenx. Gyoengqde naeuz gou bau gij gyaujswj haenx daegbied ndeigwn. Gou dingq le ndawsim gig angq, hix gwn le vanj hung ndeu.

Haha, caeuq vunz ndaw ranz bau gyaujswj gwn gyaujswj, caen haisim ha!

(lauxsae son’ gyauq: Mungz Cwngzgen/蒙成建)

Raemxda Diemz Dangqmaz

Dahcej ngoenzlwenz daj ndaw singz dauq ranz lo, lij daegdaengq cawx duz gaeq hau ndeu caeuq di byaek ndeu guh hojgoh, yienghneix guh dwg hawj dahmeh gvaq ngoenzseng, hix angqhoh gou baez neix doenggvaq gaujsi.

Banringz gvaq sam diemj lai, dahmeh caeuq dahcej cawj ndei ngaiz byaek lo, dou ranz vunz ndeu doq gwn gij byaek nanz mbouj ndaej gwn haenx, doq yawj densi, vuenyungz dangqmaz. Cingq gwn ngaiz seiz, sawqmwh duzma ranz aungeih daej lo, gou cingq henx gaiq nohgaeq ndeu liux, duzmaz cimyawj gou, gou rox de naemj gwn ndok, couh bij ndok hawj de, duzma ciep ndaej ndok liux mbouj raen lo. Youq gvaq yaep ndeu, de youq dauq daej lo, gamz gaiq ndok ndeu youq bae lo, baez youh baez dem, sawqmwh,

gou roxnyinh duzma neix ngoenz neix mbouj lumj doenghbaez, gij ndok de gamz bae haenx daengz gizlawz ni? Gou yaek ra aen dapanq neix okdaeuj. Duzma daej lo, gou ra ndaej gaiq ndok youq hung youh daiq noh ndeu vit hawj duzma. Duzma ciep ndaej ndok liux ngeux gyauej couh bae, gou cuengq vanj roengz, ganjgip riengz laeng duzma saenzmaed neix, daengzlaeng daengx roengz-daeuj lo, gou sim geizheih dwk raen: duzma dawz gij ndok ngamq gamz daej haenx soengq hawj doengh malwg swheij, haj duz ma’ iq ciep le gaiq ndok, youh buet youh diuq doxdawz gwn, mwngz gaemz ndeu, gou gaemz ndeu, sim’ angq vuenyungz dangqmaz……Yienzlaiz, duzma moix baez gamz ndok daej cungj soengq hawj malwg, hungmbwk lai! Gou sawqmwh ngeix daengz, dahmeh hix yienghneix, dawz doenghij bingzgoj vunz soengq hawj haenx suek hwnjdaeuj yo ce, dan caj dahcej caeuq gou dauq ranz gwn.

Yawj le duz-mameh, yawj le duz-mazlwg de, ndaw rwz dingqnyi gij singriu dahcej caeuq daxmeh gangriu gwnngaiz, gou lwgda hainduj roenx ok raemxda, gij raemxda neix lae daengz ndaw bak, diemz dangqmaz.

(Cangh Gyazsinh)

